



REPUBLIKA E SHQIPËRISË  
AUTORITETI I KONKURENCËS  
KOMISIONI I KONKURENCËS

VENDIM

Nr. 705, Datë 10.09.2020

**“Mbi autorizimin e përqendrimit të realizuar nëpërmjet përfutimit të kontrollit të shoqërisë Euroconsult Rental Division S.p.A nga shoqëria Intesa Sanpaolo S.p.A.”**

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 10.09.2020, shqyrtoi çështjen me:

**Objekti:** Autorizimi i përqendrimit të realizuar nëpërmjet përfutimit të kontrollit të shoqërisë Euroconsult Rental Division S.p.A nga shoqëria Intesa Sanpaolo S.p.A.

**Baza Ligjore:** Ligji Nr. 9121, datë 28.07.2003 “Për Mbrojtjen e Konkurrencës”, i ndryshuar, nenet 2, 10-12, neni 24, germa d, dhe nenet 53-64. Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit”, dhe formulari i njoftimit të përqendrimit.

**Komisioni i Konkurrencës**, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfutimit të kontrollit të shoqërisë Euroconsult Rental Division S.p.A nga shoqëria Intesa Sanpaolo S.p.A..

**VËREN SE :**

**Transaksioni dhe përqendrimi**

Pranë Autoritetit të Konkurrencës, është depozituar njoftimi lidhur me përfutimin e kontrollit të shoqërisë Euroconsult Rental Division S.p.A nga shoqëria Intesa Sanpaolo S.p.A.

*Pala blerëse:* Intesa Sanpaolo S.p.A, (ISP) është një shoqëri aksionare e themeluar dhe ekzistuese sipas legjislacionit Italian, e cila ka objekt kryesor ofrimin e transaksioneve bankare, investimeve bankare, financë të strukturuar, tregje kapitali etj. Përsa i përket transaksioneve bankare ISP u ofron klientëve referencë për një gamë të gjerë shërbimesh transaksionale, të

tilla si menaxhimi i parave të gatshme, tregtia dhe financat e eksportit, shërbimet e letrave me vlerë përmes Inbiz, platformës së Korporatave Bankare në internet.

Intesa Sanpaolo S.p.A (*ISP*) është shoqëria mëmë e Grupit Intesa Sanpaolo Group (*ISP*), e cila është i pranishëm në Shqipëri, nëpërmjet filialit të zotëruar tërësisht prej tij, Intesa Sanpaolo Bank Albania Sh.A (*ISP Albania*).

Intesa Sanpaolo Bank Albania, SHA, është një shoqëri aksionare e themeluar sipas legjislacionit Shqiptar, me objekt aktiviteti: veprimtari bankare, veprimtari financiare dhe veprimtarinë e kasave të sigurimit, pas miratimit paraprak të Bankës së Shqipërisë, veprimtari të lidhura me transaksionet e titujve, vetëm pasi të jetë licencuar nga AMF dhe veprimtarinë e ndërmjetësimit në sigurime dhe risigurime në përputhje me Ligjin Nr.52/2014.

*Pala shitëse:*

Euroconsult 2001 Srl (*EC 2001*) është një shoqëri e themeluar sipas legjislacionit Italian.

Locatec Sas di Francesco Miscioscia & C (*Locatec*) është një shoqëri e themeluar sipas legjislacionit Italian.

*Shoqëri Target:* Euroconsult Rental Division S.p.A (*ERD*) është një shoqëri aksionare e themeluar sipas legjislacionit italian, me objektet veprimtarie: blerjen, shitjen, komercializimin, marrjen e mandateve dhe përfaqësive dhe dhënien me qira të mallrave dhe pajisjeve (me përjashtim të automjeteve), për individë privatë, ndërmarrje, shoqëri, institucione krediti etj. Gjithashtu ajo mund të kryejë të gjitha veprimet tregtare, industriale dhe financiare, të pasurive të luajshme dhe të paluajshme, të nevojshme për qëllimin e shoqërisë. Në veçanti, ERD jep me qira më së shumti mallra të standardizuara, për shuma të kufizuara deri në 100,000 Euro.

ERD është aktive vetëm në Itali dhe nuk gjeneron të ardhura në Shqipëri.

### **Vlerësimi i përqendrimit**

Më datë 05 Gusht 2020, midis blerësit Intesa Sanpaolo S.p.A dhe palës shitëse Euroconsult 2001 Srl dhe Locatec Sas di Francesco Miscioscia & C është propozuar dhe nënshkruar “Marrëveshja Kuadër”, për blerjen e shoqërisë target Euroconsult Rental Division S.p.A.

Me nënshkrimin e marrëveshjes së 05 gushtit 2020, shitësit shesin dhe i transferojnë blerësit, i cili blen 283,500 aksione në zotërim të plotë të EC 2001, që përfaqësojnë 45% të kapitalit të shoqërisë dhe 94,500 aksione në zotërim të plotë të Locatec, që përfaqësojnë 15% të kapitalit të shoqërisë.

Pas përfundimit të transaksionit, Intesa Sanpaolo S.p.A do të zotërojë 60% të kapitalit të Euroconsult Rental Division S.p.A, EC 2001 do të zotërojë 30% dhe Locatec do të zotërojë 10% të kapitalit.

Kontrolli i qëndrueshëm mbi shoqërinë Euroconsult Rental Division S.p.A, është përftim kontrolli nga pala blerëse Intesa Sanpaolo S.p.A dhe ky transaksion plotëson kriteret e nenit 10, pika 1 germa b të Ligjit 9121/2003 “Për mbrojtjen e Konkurrencës”, i ndryshuar.

Mbështetur në pasqyrat financiare të palëve në marrëveshje, konstatohet se transaksioni plotëson edhe kriteret e përcaktuara në nenin 12 të ligjit nr. 9121, datë 28.07.2003 “Për Mbrojtjen e Konkurrencës”, i ndryshuar dhe si i tillë kërkohet autorizimi nga Komisioni i Konkurrencës.

Referuar nenit 3, pika 7, të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar, si edhe Udhëzimit Nr.76, datë 07.04.2008 “Për përcaktimin e tregut përkatës” treg përkatës u konsiderua tregu i qiradhënies së mallrave dhe pajisjeve, por duke qenë se transaksioni nuk do të ketë asnjë ndikim në tregun shqiptar si edhe duke iu referuar praktikave të Komisionit Evropian në çështje të ngjashme, tregu përkatës i produktit do të lihet i hapur dhe treg përkatës gjeografik u konsiderua territori i Republikës së Shqipërisë.

Përqendrimi i propozuar nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar.

#### **PËR KËTO ARSYE:**

Komisioni i Konkurrencës, në bazë të nenit 24, shkronja d dhe nenit 56 pika 1 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar,

#### **VENDOSI:**

1. Të autorizojë përqendrimin e realizuar nëpërmjet përfimit të shoqërisë Euroconsult Rental Division S.p.A nga shoqëria Intesa Sanpaolo S.p.A.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

#### **KOMISIONI I KONKURRENCËS**